



## Savjeti za popravljavanje stanja na dunjaluku i ahiretu (Medina)

Hatib: dr. Ahmed ibn Talib ibn Abdulhamid

19. šaban 1442. po Hidžri / 2. april 2021.

Svaka hvala i zahvala pripadaju Allahu. Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je Muhammed, sallallahu alejhi ve sellem, Njegov rob i poslanik, neka su na njega Allahova milost, spas i blagoslov, i na njegovu porodicu.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao - postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa našeg prvaka Muhammeda, Allahovog poslanika, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru. Uzvišeni Gospodar kaže u Svojoj časnoj Knjizi: “Da ih On prema onome što su radili nagradi i još im iz obilja Svoga da, jer On mnogo prašta i blagodaran je. A ono što iz Knjige objavljujemo sušta je istina, ona potvrđuje da su istinite i one prije nje. Allah, zaista, o robovima Svojim sve zna i On sve vidi. Mi ćemo učiniti da Knjigu poslije naslijede





oni Naši robovi koje Mi izaberemo; bit će onih koji će se prema sebi ogriješiti, bit će onih umjerenih, i bit će i onih koji će, Allahovom voljom, svojim dobrim djelima druge nadmašiti – za to će veliku nagradu dobiti: edenske perivoje u koje će ući, u kojima će se zlatnim narukvicama, biserom ukrašenim, kititi, a haljine će im, u njima, od svile biti. ‘Hvaljen neka je Allah’, govorit će, ‘koji je od nas tugu odstranio – Gospodar naš, zaista, mnogo prašta i blagodaran je – Koji nam je, od dobrote Svoje, vječno boravište darovao, gdje nas umor neće doticati i u kome nas klonulost neće snalaziti.’

A nevjernike čeka vatra džehennemska, oni neće biti na smrt osuđeni, i neće umrijeti, i neće im se patnja u njemu ublažiti - eto tako ćemo svakog nevjernika kazniti – oni će u njemu jaukati: ‘Gospodaru naš, izbavi nas, činit ćemo dobra djela, drugačija od onih koja smo činili.’ ‘A zar vas nismo ostavili da živite dovoljno dugo da bi onaj koji je trebao razmisliti imao vremena da razmisli, a bio vam je došao i onaj koji opominje? Zato iskusite patnju, nevjernicima nema pomoći!’ Allah sigurno zna tajne nebesa i Zemlje; On dobro zna svačije misli.” (Fatir, 29–37)

O čovječe, živi koliko hoćeš, ali znaj da ćeš umrijeti. Voli koga hoćeš, ali znaj da ćeš ga napustiti. Radi šta hoćeš, ali znaj da ćeš odgovarati za to. Nemoj stjecati znanje nauštrb djela. Zar tražiš od drugih, a okružen si Allahovim dobrima? Znaj da je znanje bez djela ludost, a djelo bez znanja ne postoji. Znanje koje te danas neće udaljiti od grijeha, i neće te navesti na činjenje dobrih djela, sutra te neće udaljiti od Vatre. Neka tvoje ambicije i odlučnost budu u duši, a smrt u tijelu (ne obrnuto). Tijela su ili kavezi za ptice ili torovi za stoku. Ako si od ptica koje vole visinu, letjet ćeš visoko dok se ne vratiš svome Gospodaru i ne smjestiš se u najuzvišenije dvorce Dženneta.

“A ti, o dušo smirena, vrati se Gospodaru svome zadovoljna, a i On tobom zadovoljan, pa uđi među robove Moje, i uđi u Džennet Moj!” (El-Fedžr, 27–30)

A ako si od onih koji vole nizinu, nisi siguran da ćeš s ruba dunjalučke kuće pasti u džehennemsku provaliju. “Mi smo za Džehennem mnoge džine i ljude stvorili; oni





srca imaju – a njima ne shvataju, oni oči imaju – a njima ne vide, oni uši imaju – a njima ne čuju; oni su kao stoka, čak i gori - oni su zaista nemarni.” (El-A’raf, 179)

O vjernici, bojte se Allaha, i znajte da je “razvezan” jezik i “stisnuto” srce znak čovjekove propasti. Ne možeš oživjeti svoje srce svjetlošću spoznanje sve dok ne ukrotiš svoju dušu iskrenim samoprijekorom. Radi za dunjuluk onoliko koliko ćeš boraviti na njemu, a radi za ahiret onoliko koliko ćeš ostati na njemu. Radi za Allaha onoliko koliko ti je On potreban, a radi za Vatru onoliko koliko je možeš podnijeti.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

